

1. Wéi eng Plaz huet Russland als Wirtschaftspartner fir Lëtzebuerg ?

Laut den rezensten Zifferen vum STATEC, déi am November 2015 an der "Note de Conjoncture" publizéiert goufen, an déi sech op d'Joer 2014 bezéien, geet erfier dass d'BRC Länner, dat heescht Brasilien, Russland an China 1,8 % vun den Exporter vun Déngschtleeschungen vu Lëtzebuerg duerstellen an 2,5 % vun den Exporter vu Gidder.

Nach ëmmer laut dem STATEC, wor Russland 2014 mat engem Total vun 363 Milliounen Euro op der 26ter Plaz wat den Export vun Déngschtleeschungen betrëfft, an mat engem Total vun 126,4 Milliounen Euro op der 15ter Plaz fir den Export vun Gidder.

2. Onofhängeg vun de Sanktiounen, wéi eng Bedeitung fir Lëtzebuerg kënn dem russesche Maart zou a gesinn déi Här Ministeren do besonnesch Opportunitéiten ?

Mer stelle fest, dass sech déi russesch Wirtschaft haut an enger Rezessioun befënnt, haaptsächlech bedéngt duerch de Verfall vun de Präisser op de Weltmarchéen vun Réistoffer, Petrol an Erdgas. Den Export vun dese Matièreen stellt 85% vun sämtlechen Exporter vun Russland duer. Dozou kënn d'Baisse vum Rubel, déi russesch Währung huet an de läschte Méint iwwert d'halschent vun sengem Wäert zum Dollar an Euro verluer. Dat bedeit dass sech de Präis vu Produkter, ënner anerem aus Lëtzebuerg, aus russescher Siicht méi wéi verduebelt hunn.

Opportunitéiten kéinten sech aus deser Situatioun erginn fir Betriber déi a Russland wéilten an d'Produktion vun Gidder an Déngschtleeschungen investéieren.

3. Wéini wor déi läscht Wirtschaftsmissioun a Russland, mat wéi enge Resultater, a fir wéini as déi nächst geplangt ?

Déi läscht Wirtschaftsmissioun a Russland wor am September 2012, ugefouert vum Staatsminister Juncker a vum Wirtschaftsminister Schneider. Deemools haten 21 Betriber aus Lëtzebuerg un där Missioun deelgeholl. Dës Missioun huet den Entrepreneuren erlaabt d'Regiounen vun Tambow an dem Tatarstan kennen ze léieren an do éischt Kontakter ze knäppen. Déi rezent Visite op Lëtzebuerg am November 2015 vum President vum Tatarstan, a Begleedung vun enger héichrangeger Wirtschaftsdelegatioun, beweist dass déi Relatioun, déi 2012 opgebaut gouf, haut nach Bestand huet. Am Moment ass kuerzfristeg keng Wirtschaftsmissioun a Russland geplangt, am Februar fënnt allerdings zu Sotchi eng sougenannten "Commission Mixte UE-BL-Russie" statt, mat Bedeelegung vum Privatsecteur. Bei der "Commission Mixte" handelt et sech ëm eng trilateral Wirtschaftskommissioun (Belgien/Lëtzebuersch an en Drëttland, an deem Fall Russland) déi an regelméissegen Ofstänn zesumme kënn.

4. Wéi huet sech de russeschen Tourismus zu Lëtzebuerg iwwer déi läscht Joeren (mat 2015) entwéckelt ?

Laut der "Note de Conjoncture 2-2015" vum STATEC vum November 2015 maachen d'Iwwernuechtungen aus BRC Länner (Brasilien, Russland a China) am Joer 2014 3% vum Total aus.

Fir Russland eleng sinn dat 0,7%. Et sinn sech keng gréisser Verännerungen an dësem Secteur ze erwaarden well dee schwache Rubel Destinatiounen an Westeuropa fir russesch Touristen präislech verdeiert huet. Ausserdeems gëtt et keng direkt Fluchverbindungen tëscht Russland an Lëtzebuerg, wat dem Tourismus net förderlech ass.

5. Wéi entwéckelen sech d'Resultater vun der Finanzplaz mat Russland ?

Laut den Zifferen vum STATEC, wat den Export/Import vun Finanzdéngschtleeschungen ubelaangt sin d'Exporter an der Period 2011-2014 zimlech stabel. Am Joer 2011 woren et 77 Milliounen Euro, 2012 84 Milliounen Euro, 2013 108 Milliounen Euro, 2014 97 Milliounen Euro. Domat ass Russland, wat den Export vun Finanzdéngschtleeschungen ubelaangt, ongeféier op der 40. Plaz mat engem relativen Undeel vun ëm 0,0025 % vum Total.

6. Ass en Impakt vun de Sanktiounen bei den Déngschtleeschungen ze spieren, z.B. bei den Aktivitéiten vum Freeport, dem Loftcargotransport oder soss an der Logistik ?

En Impakt vun de Sanktiounen op den Export vun Déngschtleeschungen ass net feststellen. Déi Zifferen, déi disponibel sinn, d.h. bis d'Joer 2014 inclus, weisen eng moderat awer konstant Progressioun vun den Exporter vun Déngschtleeschungen: vun 183 Milliounen Euro am Joer 2011, op 247 Milliounen 2012, 340 Milliounen 2013, 363 Milliounen 2014. Sektoriell Statistiken, ausser fir Finanzdéngschtleeschungen, sinn net disponibel.

7. Wéi entwéckelen sech déi Russesch Investitiounen hei am Land ?

Esou wäit Informatiounen iwwer Investitiounen aus Russland der Ëffentlechkeet zougänglech sinn, schéngen dës Investitiounen iwwer déi läscht Joeren och moderat awer konstant ze wuessen. Och hei ass keen Abroch feststellen.

8. Wéi en Impakt hunn d'Sanktiounen op déi lëtzebuergesch Agrikultur ?

Well d'Quantitéite vu lëtzebuergesch landwirtschaftleche Produkter déi a Russland exportéiert ginn ganz kleng sinn (oft fir manner wéi 100'000 EUR, 2013 fir 325'000 EUR) ass den direkten Impakt vun den EU Sanktiounen op äis landwirtschaftlech Betriber ganz kleng bzw. inexistent.

Déi aktuell wirtschaftlech Situatioun a Russland zesumme mat den EU Sanktiounen kéint allerdéngs dozou bäidroen, dass d'Präisser vun eenzelnen landwirtschaftleche Produkter, wéi z.B. der Mëllech, op den internationale Mäert säit Abrëll 2014 weider falen, wourënner och déi lëtzebuergesch Betriber leiden.

9. Wéi eng vun de verschiddenen Zorten Sanktiounen, déi d'EU géint Russland verhaang huet, haten oder hunn e besonnesch staarken Impakt op Lëtzebuerg ?

Nieft dem Fall vum Rubel, an der Rezessioun a Russland déi ënnert dem Punkt 2. beschriwwe gouf, hunn och d'Sanktiounen en negativen Impakt op äis Exportatiounen a Russland, déi zwëschen 2013 an 2014 ëm 20% zeréck gaange sin. Innerhalb vun deenen Exportatiounen si viirun allem d'Kategorien « Métaux communs et ouvrages métalliques » an « Machines et appareils » betraff, wou äis Exportatiounen eng Baisse vun 40%, resp. 24,5% zwëschen 2013 an 2014 verzechnen. (Fir 2015 gin et nach keng oofschléissend Chiffren).

10. Wéi eng Positioun vertritt Lëtzebuerg am EU-Conseil wat Sanktiounen géint Russland ugeet ?

D'Sanktiounspolitik vun der EU géigeniwer Russland sin als eng Reaktioun op d'Violatioun vun der territorialer Intégritéit vun der Ukraine vum Conseil européen décidéiert an agefouert gin. De Conseil européen vum 19. an 20. März 2015 huet dunnen direkte Lien zwëschen der Durée vun deene Sanktiounen an der Ëmsetzung vun de Minsker Accord'en hiergestallt.

Och wann déi Accord'en nach nët ganz ëmgesaat gi sin, begréissen mier d'Fortschrëtt déi bis elo gemaach gi sin a mier hoffen dass all Effort'en ënnerholl wäerte gin, déi zu engem Ophiewen vun deene Sanktioune féieren.

Mier mengen allerdings, dass, an den Domainer déi vun de Sanktiounen nët betraff sin a v.a. an der Terrorismuspräventioun a -bekämpfung d'Coopératioun mat Russland soll weider gefouert an verstärkt soll ginn.

11. Ass déi lëtzebuerger Regierung fir Visumerliicherungen fir russesch Staatsbierger ?

De Visa-Dialog tëschent der EU a Russland ass am Kontext vun der Krim-Annexioun suspendéiert ginn. Lëtzebuerg stoung virun där Suspensioun vum Dialog der Fro vu Visumerliichterungen fir russesch Staatsbierger oppe vis-à-vis, a géif et begréissen, wann d'Conditionen erfëllt wieren, fir deen Dialog nees opzehuelen. Lëtzebuerg hëllt am Allgemengen eng konstruktiv Positioun op Froe vu Visumerliicherungen fir Bierger aus Drëttlänner, well esou Visumerliicherungen den direkte Kontakt tëschent de Leit fördern. Dëst gëllt och fir Russland.